

# La Pagina da Surmeir

68 avla annada | Nr.33 | 14 d'avost 2014

## SOCIALESSER

*Cunter/Honduras: Patricia Scarpatetti survign rancunaschientscha*

## En premi ed en nov project

●pb. Siva digl 2007 magna Patricia Scarpatetti da Cunter ena tgesa d'unfants dalla veia a Honduras. Igl sies angaschamaint ò er adegna catto sustign an Surmeir. Ossa dattigl er rancunaschientscha cun en premi doto cun 10 000.– fr. Ed i dat er gio en nov project.

Honduras, chella tera cun 7.7 miu. abitants ainten l'America centrala è egna dallas pi povras teras digl mond. Igl 2006 vivevan 78% an povradad e 43% zont an misergia. Cun tot igls problems socials: criminalitad, alcohol, drogas. Ed igls pi debels dalla societad èn pertutgias igl pi ferm, igls unfants. Savens da nign davaintan els unfants dalla veia e lour sulet sustign ainten la societad èn drogas e bandas criminalas.

Igl 2004 è Patricia Scarpatetti (33) stada per l'amprema geda a Honduras scu voluntaria ainten ena tgesa d'unfants svizra manevel agl sagond grond martgea dalla tera, San Pedro Sula.

Siva dus onns è ella turnada



Igl mument è Patricia Scarpatetti cun Juan Carlos, egn digls unfants dalla tgesa «Yo quiero ser...» a Cunter an vacanzas.

## SURVISTA

### Glindesde antscheva la scola

Glindesde antscheva igl onn da scola 2014/15. Schibagn per las scolas an Val Alvra e zont an Surses dattigl fermas midadas ainten la structura. Per gronda part an consequenza dad en svilup demografic betg favorevel.

pagina 3

### Dus fieras an Surmeir

Venderde passo è stada la Scuntrada a Savognin ed igl de siva la fiera da stad a Lantsch. Nous ischan stos preschaints e vagn er dumando an tots dus lis divers visitaders tge tgi manegian da chellas dus occurrenz.

paginas 4-6

### Relaziuns extrem grevas

Chegl ègl sto dumengia passada a Radons tar ena concurrenza per igls tgangs da tschertga cun lour patrungs. Plievgia e favogn vevan pretendia tot e mengia bler digls cumpogns da quatter tgommas e lour isma extraordinaria.

paginas 10/11

### La stad cun ora d'aton

Savens brainta e temperaturas betg usitadas per la stad. Chegl è aglmanc l'impressiun subjectiva tgi vagn dalla stad. Scu ègl veiramaintg sto? Tge deian las statisticas? Raspostas vainsa tschartgea a mang digl meis da fanadour.

pagina 12